

ÇE YƏHYA SEMİNƏ NOMƏ

VƏSƏ

«Çe Yəhya Seminə Nomə» çe icmo Qay nomədə bə bə qıləy rəhbəri vığandə bə. Həvariye Yəhya bə co məsihiyon koməqəti kardeyro tarif kardeydə əy iyən Diotref nomədə bə i kəsi çəşnavi kardeydə.

Kitobi məzmun:

1:1-8 Bə Qay nıvıştə bə tarif iyən nəsyət
1:9-12 Diotref iyən Dimitri barədə
1:13-15 Vido kardey

1

Bə Qay nıvıştə bə tarif iyən nəsyət

¹ * Az sipirişiku səlom bıbu çımı de həğiğiye mehibbəti piyə bə azizə Qay!

² Ha çımı azizqiromi, dıvo kardeydəm ki, tı har çiyədə ovandin bibi, ruhən ovandin bey gəzinə ıştı conən ovandin bıbu. ³ İmoniyə boon oməyn ıştı bə həğiğəti anqıl beyku, yəni bə həğiğətiro jiyeyku şoydəti kardeədə az vey şo bim. ⁴ Bomı çımisə yolə şoyvo ni ki, bıməsım çımı fərzəndon bə həğiğəti mıvofiğ jiyeydən.

⁵ Ha çımı azizqiromi, tı bə imoniyon nişo kardə har xıdmətədə bəfomandəti kardeydəş, hətto əvon açın bıbonən tı imi kardeydəş. ⁶ Im imoniyə boon ıştı mehibbəti barədə icmo vədə şoydəti kardışone. Çok bəbe ki, qirəm tı bə Xıdo xatır bəçəvon dəro kardeyən koməqəti bıkoş. ⁷ Oxo əvon bə Məsihi xatır çe imon nıvardəkəsonku hiçiy peniqətışone dəro qınin. ⁸ De jıqoy əmə həğiğəti koədə həmkə beyro bı jıqo odəmon koməqəti kardəninimon.

Diotref iyən Dimitri barədə

⁹ Az nıvıştımə bə imoniyon icmo, əmma çəvon dılədə yoliəti karde piyə Diotrefi gəbul nıkardışe əmə. ¹⁰ Qirəm az bom, çəy kardəyon bə yod bəvardem, əv çəmə barədə yavə sıxan kardeydə. Im kamebən, ıştən imoniyə boon gəbul kardeydəni, bə imi karde piyə kəsonən mane beydə iyən əvoni imoniyon icmoo tojneydə.

* 1:1 Həv.19:29; Rom.16:23-24; 1Kor.1:14-15

¹¹ Ha çımı azizqıromi, çokiku nımunə peqət, bevəciku ne. Çoki kardəkəs bə Xıdo aide, bevəci kardəkəsi vindəşni Xıdo. ¹² Həməkəs voteydə ki, Dimitri çokə odəme, ım həğigətən jıqoye. Əmənən şoydimon bimi, şımənən zıneydəşon ki, çəmə şoydəti etiboyne.

Vido karde

¹³ Bətı nıvıştənin bıə vey çiy heste, əmma ımoni de mırəkkəbi iyən ğələmi nıvışte piyeydəmni. ¹⁴ Umudəvom ki, bı nezonədə tını bəvındem, dimbədım sıxan bəkamon.

¹⁵ Bətı sulh bıbu. Duston səlom vığandeydən botı. Bəçəmə əyo bıə duston qıləbəqılə şəxsən səlom bıvot.